

Rudy Davelaar di Aruba Marine Park Foundation:

Hopi hende no ta compronde e impacto cu e epidemia di Lionfish ta causa na bida marino

ORANJESTAD – Lionfish (Pterois antennata), ta un epidemia y hopi hende no ta compronde e impacto cu e tin riba nos medio ambiente. Segun presidente di Aruba Marine Park Foundation, Sr. Rudy Davelaar, mescos cu riba tera tin e problematica di boa, lama tambe tin su problema cu ta e Lionfish. Tin cu bay mas den detaye kico e especie aki ta nifica.

LIONFISH PANOORD DI ARUBA

Aruba Marine Park Foundation ta traha hunto cu varios boluntario, tanto hendenan local como bishitantenan cu ta sambuya y ta purba di controla den varios area e poblacion di Lionfish door di captura esakinan y pone nan riba menu pa come. Recientemente, door cu e biento tabata bolter asina tanto, e parti noord di Aruba tabata basta tranquil y a haya chens pa sambuya patras di e area di Tierra del Sol, bay mas oost. E problema tabata cu coriente tabata hopi duro pero a bin nota si cu tabata tin un abundancia di Lionfish parti noord di Aruba den e area cu nan a sambuya. Si mira e comparacion for di Arashi te cu Isla di Oro of te cu Valero, tin varios centro di buceo, cu ta controla e parti west y zuid di Aruba. Segun Davelaar tin hopi cifra y dato tocante di esaki. Sinembargo e parti noord di Aruba, pa motibo cu eynan no tin hopi actividad di buceo, e Lionfish ta haya hopi chens pa produci eynan.

**20 PA 30 MIL WEBO
CADA 5 DIA**



Davelaar a splica cu riba tera por ehempel boa ta afecta varios di nos tiponan di parha. E ta afecta lagadishi, yuwana y diferente tipo di bestia cu nos tin den nos medio ambiente riba tera. Pero bao di awa, e problematica ta mucho mas grandi, pasobra Lionfish ta reproduci cada 5 dia, 20 pa 30 mil webo. Den un aña un embra por produci mas of menos 2 miyon webo. Esaki si bisa djis un porcentahe di dje so a sali for di webo y bira adulto. Ta papiando aki di 20 pico mil Lionfish cu cada embra so lo por logra cu ta yega adulto. Esey ta si coy un porcentahe masha abao mes. E unico cos cu Aruba Marine Park Foundation ta haci pa

Lionfish ainda cu pisca den su boca. Foto cortesía Erin Cziraki.



Lionfish riba menu den forma di sushi.

preveni e expansion di e poblacion di Lionfish ta door di gara nan mas tanto posibel y door di gara nan bo ta preveni cu nan ta plama of ta reproduci y cu nan ta haci mas daño na e medio ambiente marino door di come e piscanan riba rif.

COMPETENCIA

Prome competencia di Aruba Marine Park Foundation a tuma luga dia 30 di april cu a tuma luga na Centro di Pesca Hadicurari. Riba e dia ey so mas di 800 a wordo entrega. E siguiente competencia lo tuma luga dia 27 di october y lo tuma luga riba De Palm Island. E fundacion ta trahando cu De Palm Tours riba e evento aki. Pronto lo bay publica mas riba e evento aki. Full e actividad lo bay keda concentra riba e rif.

KICO TA LIONFISH

E Lionfish, eroneamente yama Pisca Scorpion, ta un pisca di e famia Scorpaenidae. Su habitat natural original ta e lagun y rifnan di Ocean Indico tropical y Pacifico occidental. Nan ta descansa durante dia y ta jaag riba cabaron y cangreu durante anochi. E ta crece un maximo di 20 centimeter.

Su pica ta venenoso: e radionan di su fin di lomba, dos di e radionan di e fin na barica y dos di e fin anal ta ekipa cu klier nan venenoso. E picanan aki por provoca herida doloroso na buceadonan, mientras cu e veneno cu e ta saca por causa paralisa funcion di pulmon humano, problema di circulacion di sanger y keintura. E sintomanan generalmente ta desaparece despues di un of dos dia.

E especie aki ta solitario y hopi probabel por hay'e den fondo di lama, caminda nan ta landa lentamente y ta hinca su presa den un skina cu su fin.

E especie aki a haci su aparicion na Aruba no mucho tempo pasa, pero pa e tempo cu el a manifesta su mes den awanan territorial di Aruba, el a haci basta efecto riba nos fauna marino. □